

HILDUR ELÍN VIGNIR

SAMVINNA SEM SKILAR ÁVINNINGI



Hildur Elín Vignir

Fyrir nokkru hóf IÐAN fræðslusetur markvissar heimsóknir og kynningar í fyrirtækjum aðildarfélaga okkar undir heitinu Fyrirtækjaþjónusta. Hefur þjónustan skapað sér ákveðinn sess hjá IÐUNNI og á síðasta starfsári var til að mynda 151 fyrirtæki sótt heim. Í einni slíkri heimsókn hjá Slippnum á Akureyri kom fram að þörf væri á menntuðum málmsuðumönnum. Námskrá í málmsuðu hefur um nokkurra ára skeið verið hluti af aðalnámskrá framhaldsskóla en námið í raun hvergi verið kennt. Námið er 75 eininga löggilt iðngrein sem lýkur með lokaprófi úr skóla og sveinsbréfi en í því er mjög mikil verkleg og sérfræðileg suðukennsla.

Í samvinnu við Félag málmíðnaðarmanna á Akureyri (FMA), Verkmenntaskólann á Akureyri (VMA), Slippinn og

Símenntunarmiðstöð Eyjafjarðar (SÍMEY) var því ákveðið að kanna hvort ekki væri hægt að mæta þessari þörf. Ljóst var að ef uppfylla ætti þörfina þyrfti margt að ganga upp og töluverðum tíma var varið í að greina og undirbúa ferli sem hentaði.

Ákveðið var að bjóða upp á raunfærnimat í málmsuðu á Norðurlandi sem var samvinnuverkefni IÐUNNAR, VMA, FMA og SÍMEY með liðsinni FA eins og í öðrum raunfærnimatsverkefnum. Fór matið fram í september 2013. Matsaðilar voru fagmenn IÐUNNAR og VMA en ráðgjafar í verkefninu voru frá IÐUNNI og SÍMEY. Í framkvæmd matsins var töluvert um verklegar æfingar og því framkvæmdin flóknari en oft áður. Skemmst er frá því að segja að mjög vel tókst til og fengu þátttakendur, sem voru 12 talsins að meðaltali, um 42 einingar metnar. Meðalaldur þátttakenda var 35 ár og höfðu þeir allir a.m.k. 5 ára starfsreynslu í málmsuðu.

Í framhaldi af raunfærnimatinu bauð VMA upp á nám í málmsuðu sem var tilraunaverkefni IÐUNNAR og VMA. Í því fólst meðal annars að sérfræðingur frá IÐUNNI kom og kenndi áfanga í lotum sem ekki var þekking til að kenna innan VMA. Nýttu 10 einstaklingar úr raunfærnimatinu sér það námstilboð. Þeir útskrifuðust svo frá VMA í desember og fengu sveinsbréf afhent í framhaldinu við háttíðlega athöfn í Iðnaðarsafninu á Akureyri. Þótti sú staðsetning vel við hæfi þar sem verið væri að afhenda sveinsbréf í málmsuðu í fyrsta sinn. Tíu stoltir einstaklingar voru nú komnir með



Jóhann Rúnar Sigurðsson formaður FMA.



Jóhann Rúnar, Páll Ómar einn þátttakenda og greinarhöfundur.



Útskriftarhópurinn ásamt Jóhanni Rúnari FMA, Bettý Kristjánsdóttur Símeý og greinarhöfundi.

burtfararskrirteini frá VMA og sveinsbréf í málmsuðu eftir að hafa starfað árum saman sem „ófaglærðir“ á vinnumarkaði.

SAMANTEKT

Þetta dæmi sýnir með óyggjandi hætti að unn er að lyfta grettistaki í menntamálum í atvinnulífinu þegar allir leggjast á eitt, aðilar vinnumarkaðarins, fullorðinsfræðsluaðilar og framhaldskólarnir.

Nú er í gangi annar hópur í raunfærnimati í málmsuðu og koma að því verkefni sömu aðilar og fleiri til. Nær sá hópur til margra víða um land. Í framhaldinu munu IÐAN og VMA vinna saman að nýju til að bjóða upp á námsbraut í málmsuðu með sambærilegum hætti og áður var gert og vonandi tekst okkur áður en langt um líður að útskrifa nýjan hóp stoltra málmsuðumanna.

UM HÖFUNDINN

Hildur Elín Vignir er framkvæmdastjóri IÐUNNAR fræðslu- seturs. Hún hefur B.Ed.-próf frá Kennaraháskóla Íslands og hefur lokið diplómanámi í náms- og starfsráðgjöf. Hildur Elín var áður partner hjá IMG sem í dag heitir Capacent.